



Ärvvsaž tää'ssvää'ld presidentt, šiögg ää'veempoodd prää'zneckue'ss!

Sää'mkultturkõöskõs Sajoozz leä'p tä'bbe prää'znkâ'sttee'l risttmen ââ'nmõ'sše, da ju'n ee'jjest 2000 älggam kultturkõöskõsha'ñkkõs lij vuõžžum vee'rlânji valmmša.

Sajos-põört plaanmõš aa'lji 2-poddsaz arkktehtkeâsttõõttmõõžžin, koon vuõ'itte nuõr Janne Laukka da Tuomas Niemelä Halo-Arkkitehdit Oy:st, da jõs tuõstam sárnad suâna le'jje te'l veâl alttõõlli, koin ij leämmaž veâl tobddmõš näkam ha'ñkkõ'sse.

Nuõrrvuõtt da occnjaž tobddmõš jiâ leämmaž cõggmen näkam jeärmmi tu'mmstõõggid da o'nnstam ha'ñkkõõzz cõõđ viikkmõ'sše.

Janne Laukka da Tuomas Niemelä va'ldde pa'ldde ha'ñkkõõzz vä'lddplaaneei va'sttõõzzid kue'dded Janne Pihlajaniemi Arkkitehdit M3 Oy:st.

Sajos-põört älggarkktehtuur maainast jiijjâz veiddsõs tobddmõõžž rännsmei da sõtti ceäggluu'deezvui'm, kook jee'resnallšem raajjâm ma'llsõs tekniikkain da juâkkain rä'jje vaajtõõvvi cõõđvuei'nnem tää'zzid kiičceei kiõčcâmvue'jjest.

Põört sii'skbeä'lnn vuârstes paneel oo'le, koin lij kuunârnallšem vuä'mm raajjâmnääll, rä'jje vuâstbeä'l älggsee'ni sõttivuõ'tte da sii'skbeä'lnn tobddai raavâs õhttvuõtt luõttu.

Šiögg kue'ss! Sajos leäi ju'n altteem poodd čuõ'vves ärvvpõrtt. Haa'lääm spä'ssbõõššâd da ä'jsted šiögg leekk ha'ñkkõõzz arkktehtnee'kkid, da tuäivam ti'jjid älggam ouddu'rddee'jen lââ'zz näkam šiögg o'nnstumuužžid.

Põört raajjâmtuâjain va'stii ISS Proko Oy da vä'lddurkkoomžen tuâimmji Keski-Suomen Betonirakenne Oy, koon haa'lääm še spä'ssbõõššâd puâ'rast o'nnstam ha'ñkkõõzzâst.

Ha'ñkkõõzz o'nnstumu'sše liâ mie'ttvaikktoõdeel puättam Sajos-põört puõ'tti õõ'nni. Projeekt valmštõõllâm- da plaaneempoodd puõ'tti õõ'nnji tuärjõs da vuä'pstõs liâ leämmaž ko'rvveete'm, da liâ ouddam vuäittmõõžžid tõn ââ'nnemvuõđ- da tuâimmjemtäävtõõzzid, kook liâ tuejjääm Sajos-põörtâst o'dinakai.

Toobdam åå'n räämm da lääskvõsvuõđ, ko Lää'ddjânnam Sää'mkulttur lij vuäžžam ââ'nnem vuâlla jiijjâz kultturkõöskõõžžes.

Tuäivam põört õõ'nnjid, Sää'mteggä, sää'mvuud škoou'l'jemkõõskõ'sše, ke'rijpõ'rtte, arkii've da sää'mõhttoõttõõzzid ku'kes, o'nnstem puõ'ttiää'j õõutsâ'jest Sajos-põörtin.

Ååskam, što Sää'mkultturkõöskõs Sajos puätt miârkkšõõvee'l ree'ğğsmâ'tted da lââ'zzted sää'mkulttur da kiõl pue'rjie'llem!